

Jemes

Nəgkiariien sə rani mə nəfe i nəkukuə

Ia nuk 48 Jemes rıməkupwən mırari nəkukuə i ia nəkukuə me pam ia Niutestamen. Jemes in piəvi Iesu. In iəmə asori riti ia nəmə asori me səvəi nakalasia me fwe Jerusalem. Nəkukuə səvənhi revən ti nakalasia me pam rıpkəvən mhə ti nousəsımwinien səvənraha kuatia. Jemes rımərai nəkukuə i mə trahatən nakalasia me ia noien səvəi nərmama səməme kamhahatətə ia Kristo. In rini mə trini mınuə nahatətəien səvəi iərmama riti ro nıpərhiēnien, tukətoni ia noien səvənhi. Jemes ramahatən nərmama ia narimnari me mını mə niemaha trəpwəh nəpiien irəha. Irəha tuhəpwəh nını ərəhaien irəha me. Irəha tuho rəmnəmwhen a ia nirəha me. Irəha tuhətui amasan ti nəfe nərəmınraha rani. Irəha tuhəpwəh nəfiəutəien irəha. Irəha tuho nətərigien səvənraha rəpwəmwis nənə mhəfwaki.

Nəgkiariien sə rakupwən

¹ Iou Jemes. Iou iərmama riti sə iakamo tukwini nari m Kumwesən mine Iesu Kristo Iərimənu səkitaha. Iakamərhi pehe nəkukuə i rauvehe tukumiaha kwənəkwus twelef səvəi nəkur Isrel hiamarə kirkiri ia tənəmtənə me. Iakani ramasan tukumiaha.

Nahatətəien mine nukurənien

1:1: Kal 1:19, Wok Me 15:23, 1Tes 1:1

² Piak me, narimnari me səpəmsəpə tuhəuvehe mho nəmisəien m kɪmiaha. Nəpɪn tihətoni, rerɪmiaha traməkeikei magien.

³ Kimiaha hiəuvəukurən raka mə nəpɪn nəmisəien ruvehe mə tro mətə sas ia nahatətəien səkɪmiaha, noien nəha tro hiəuvehe mhəskai mwi ti nərer əknekinien ia nahatətəien səkɪmiaha.

⁴ Nənə kɪmiaha tihaməkeikei mhərer əknekɪn ia nahatətəien səkɪmiaha ia nəpɪn me mheste pen nəpɪn sə tihəuvehe mhatukwatukw mhəmwhen, nari riti mwi ko rɪpkɪwən təni mhə kɪmiaha.

⁵ Trɪni mɪnuə kɪmiaha riti nukurənien səvənhi rəpwəh nəmwhenien, ramasan mə in trəs Kumwesən sə rauvei pen auər a narimnari me m nərmama me pam mɪpkətə ərəha mhə irəha. Nənə Kumwesən trasitu irə, mo nukurənien səvənhi ruvehe məpwəmwis mwi.

⁶ Mətə nəpɪn iərmama nəha trəs i, in traməkeikei mahatətə ia Kumwesən, məpwəh nəmkiəmkiien, ti nəri nə mə iərmama sə raməmkiəmki nari rəmwhen ia peiau ia təsi nɪmətagi raməpwi raməsəsau əpnəpen.

⁷ Iərmama iamɪnhi ko rəpwəh nətəien mə tru-vehi nari riti ruku pen ti Iərimənu,

⁸ ti nəri nə mə nətərigien səvənhi ro kəru ko rɪpkərəer mhə ia nari kuatia ia noien me sə in ramo.

Iərmama auər a mɪne iərmama sə nautə səvənhi rasori

⁹ Trɪni mɪnuə piəvtaha riti nautə səvənhi riwən, ramasan mə rerɪn tragien nəpɪn Kumwesən tru-vehi utə in.

¹⁰ Rəmwhen a mwi trini minuə piəvitaha riti nautə səvənhi rasori, ramasan mə rerin tragien nəpin Kumwesən truvehi irapw in. Iakani iamınhi irə ti nəri nə mə iərmama nautə səvənhi rasori traukei məmwhen ia tihi nurhi.

¹¹ Nəpin meri rutə məpnəpan pik mənhi nurhi, nurhi trimhiə, tihin traukei məsas, namasanien səvənhi triwən. Ia noien nəha rəmwhen a mwi iərmama nautə səvənhi rasori. Nəpin ramavən mamowok səvənhi, in tremhə, nautə səvənhi triwən.

Kumwesən ko ripko mhə iərmama rimwei ia nərəhaien

¹² Nəpin nəmisəien truvehe mə tro mətə sas ia nahatətəien səvəi iərmama riti, trini minuə iərmama nəha ramərer əknekın ia nahatətəien səvənhi, rerin tragien. Nəpin nəmisəien nəha traraka irə, Kumwesən truvei pen nimiruien rerin min rəmwhen kəfəfau pen kəfəfau səvəi nisaiien m iərmama riti. In rino raka promes mə truvei pen nimiruien rerin nəha m nərmama me səməme hokeikei in.

¹³ Trini minuə iərmama riti riregi noien ərəha ravi nətərigien səvənhi, iərmama nəha trəpwəh niniien mə, “Kumwesən rərhi pehe nəri i, mavi nətərigien səiou irə mə takimwei.” In trəpwəh niniien nəgkiariien nəha ti nəri nə mə noien ərəha ko ripkivi mhə nətərigien səvəi Kumwesən, nənə ripko mhə noien səvəi Kumwesən mə trivi nətərigien səvəi iərmama irə.

¹⁴ Mətə iərmama triregi noien ərəha ravi nətərigien səvənhi nəpin rerin atukw ramrhi noien

ərəha sə in rokeikei mə tro. In nə ravi nətərigien səvənhi mamiri raka in.

¹⁵ Nəpɪn iərmama rerɪn rɪnamrhi noien ərəha sə in rokeikei pɪk mə tro, noien ərəha nəha truvi nətərigien səvənhi mo in rɪmwei. Nənə noien ərəha truvehə masori ia nɪmɪruien səvənhi mukuə kwənkwan nə iərmama nəha tremhə.

¹⁶ Piak keikei me. Kimiaha tihəpwəh nəseniien iərmama riti reikuə ia kimiaha.

¹⁷ Narimnari me pam səməme hamasan mhatukwatukw kauvei pehe m kitaha kamhəuku pen fwe ia neiai. Kumwesən ramərhi irapw pehe narimnari me nəha. In rɪno meri, mɪne məkwə, mɪne kəməhau me ia nɪmagouagou. Noien səvənhi ko rəpwəh nərariien, uə in ko rəpwəh nərariien muvei pehe təkutan m kitaha, məpwəh kitaha samarə ia nəpitəvien.

¹⁸ Tɪ nəri nə mə Kumwesən rokeikei in rərhi pehe nəgkiariien sə ro nɪpərhiienien. Nəgkiariien nəha ro kitaha səuvehe mhəno nəkwərhakwərha me səvənhi. Kumwesən ro iamɪnhi irə mə ia narimnari me pam in rɪno kitaha tsəmwhen ia kwənkwai nei me sə vi tukukupwən kesi.

Kimiaha tihaməkeikei mhətərig ia nəgkiariien səvəi Kumwesən mho nəfe rani.

¹⁹ Piak keikei me, rerɪmiaha tramrhi nəgkiariien i. Nəpɪn kimiaha hiaməgkiari, tihaməkeikei mhətərig amasan, mhəpwəh nəgkiari akwauakwien. Kimiaha tihəpwəh nəseniien niemaha rəpi akwauakw kimiaha,

20 tì nəri nə mə niemaha səvəi iərmama ko rɪpkukuə pehe mhə nukwan sə ratukwatukw rəmwhen Kumwesən rokeikei.

21 Kimiaha tihaməkeikei mhərarki raka noien me pam səməme həmkemik mine noien ərəha me nəha həpik ia nimiruien səkimiaha. Tiheiwaiu mhətərig amasan tì nəgkiariien nəha kinəpwei rəmwhen ia nuni nari ia rerimiaha. Nəgkiariien nəha rukurən nuvehimiruien kimiaha.

22 Mətə tihaməkeikei mho nəfe nəgkiariien nəha rani. Trini minuə kimiaha hiamətərig a irə, hiameikuə atukw a ia kimiaha.

23 Trini minuə iərmama riti ramətərig a ia nəgkiariien səvəi Kumwesən, mətə rəpwəh noien nəfe rani, in rəmwhen ia iərmama sə ramətə nənimen ia klas.

24 Nənə nəpɪn rətə raka nənimen, məpwəh mevən, təkwtəkwuni a mwi renouenou mə nənimen rɪnəfo irə.

25 Mətə iərmama sə raməti pen ia loa atukwatukw nəha sə rameivinari ia nərmama, nənə raməti pen mamətə ia nəpɪn me, mɪpko mhə in iərmama sə ramətərig a nənə menouenou i, mətə in ramo nəfe loa nəha rani, iərmama sə ramo iamɪnhi Kumwesən trəkwein amasan irə ia nəfe wok səvənhi ramo.

26 Trini minuə iərmama riti rerɪn ramrhi mə in iərmama səvəi nəfwakiien, mətə rɪpkətə amasan mhə tì nəfe nərəmɪn ramɪni, in rameikuə atukw a irə. Nəfe nari in ramo mamsiai Kumwesən irə ramo auər a.

27 Kumwesən in Tata səkɪtaha. Noien i nəkur əfwaki me tuho mhəsiai in irə sə ratukwatukw

1:20: Pri 7:9 1:21: Kol 3:8, 1Tes 2:1 1:22: Mat 7:26, Rom 2:13

1:25: Rom 8:2, Jem 2:12, Jon 13:17 1:26: Sam 34:13, Sam 141:3

məmher ia nənimen, in i irəha tuhaməkeikei mhasitu ia nīpran me səməme nərman me səvənraha hemhə mhəpwəh irəha, mhasitu ia nəkwerhakwerha kemhə tənī irəha, nənə mhətui amasan mwi tī nīmīruien səvənraha mə noien ərəha me səvəi tīprənə i tuhəpwəh noien irəha həuvehe mhəmkemik.

2

Kimiaha tiho rəmnəmwhen a ia kimiaha me

¹ Piak me, kimiaha hiənahatətə raka ia lərimənu asori səkitaha Iesu Kristo. Ro pen kimiaha tihəpkopəiti mhə ia kimiaha me, mətə tiho rəmnəmwhen a.

² Trini minuə kimiaha hiousəsimwin kimiaha me, nənə iəmə kəru krouuvnimwə pehe, riti tinari səvənhi ramasan, ruvei pen rig kino ia kol, riti nautə səvənhi riwən, tinari səvənhi rəpəruəpəruə, kimiaha tihaməkeikei mho rəmnəmwhen a ia nīrau.

³ Rərəha mə hiəsiai iəmə tinari səvənhi ramasan, mhəni pen tukwe in mə, “Uvehe, məkure i ia kwopun amasan ikin,” mhəni ərəha iəmə i nautə səvənhi riwən mə, “Ərer pen fwe,” uə “Əkurei irəpw ia nisuk.”

⁴ Nəpīn kimiaha hiamo noien me iamīnhi, hiətōni mə kimiaha nepwin hiasori mhəpi raka kimiaha nepwin. Nənə hiaməkiri nərmama ia nətərigien ərəha səkimiaha.

⁵ Piak keikei me, hətərig ro. Kumwesən ruvərfi raka nərmama nautə səvənraha riwən ia təkure tīprənə i mə nahatətəien səvənraha triskai. In ruvərfi raka mwi irəha mə tuhəuvnimwə pen

ia nitətə sə in ramərımənu irə. Nitətə nəha Kumwesən rıməni mə nərmama səməme hokeikei in tuhəuvnimwə pen irə.

⁶ Mətə kimiaha hiamətə ərəha a nərmama me nəha nautə səvənraha riwən. Mətə nisimə nəha kamho nəmisəien m kimiaha? Nisimə nəha kamhəvi irapw kimiaha ia kwopun kaməkiri nəgkiariien ikın? Kwa nərmama me nəha nautə səvənraha rasori kamho iamınhi irə.

⁷ Irəha nəha kamhəni ərəha nahag asori səvəi Iesu, nəhag sə Kumwesən rinəkwein kimiaha irə.

⁸ Mətə loa asori səvəi Iərımənu səkitaha raməmak ia Nəkukuə Ikinan rani mə, “Tikaməkeikei mokeikei piam rəmwhen ikokeikei atukw ik.” Trini mīnuə kimiaha hiamesi pen pərhiən nəgkiariien nəha, hiamo noien amasan.

⁹ Mətə trini mīnuə hiamopəiti ia nərmama nepwın, hiamo noien ərəha, nənə loa nəha tro pui kimiaha, mīni mə kimiaha nərmama sə hiamərui Loa.

¹⁰ Trini mīnuə iərmama riti ramarkut mə tresi pen pam nəfe Loa səvəi Kumwesən rani, mətə rapəti ia nəgkiariien kuatia a, rəmwhen mə in rinərui nəgkiariien me pam ia Loa nəha.

¹¹ Kumwesən nəha sə rıməni mə, “Tikəpwəh nakresien pran səvəi iərməpə,” Kumwesən nəha in nəha rıməni mwi mə, “Tikəpwəh nousi əpuneien iərmama.” Trini mīnuə ikəpwəh nakresien pran səvəi iərməpə, mətə ikamousi əpune iərmama, ik iərmama ikamərui ihi Loa səvəi Kumwesən.

¹² Nəgkiariien me səkimiaha mīne noien me səkimiaha tuhaməkeikei mhesi pen loa sə rameiv-

inari ia kimiaha. Kimiaha tihaməkeikei mho iaminihi irə ti nəri nə mə Kumwesən trəkiri kimiaha ia loa nəha.

¹³ Trini minuə iərmama riti rəpwəh napiien nərmama nəpin raməkiri irəha ti noien me səvənraha, Kumwesən trəpwəh napiien in nəpin trəkiri in ti noien me səvənhi. Napiien ti iərmama ramasan məpi raka nəkiriien in ti noien me səvənhi.

Nahatətəien sə ripko mhə nari riti ro nəri auər a i

¹⁴ Piak me, trəfo masitu ia iərmama riti trini minuə rani mə ramahatətə ia Iesu Kristo mətə in ripko mhə nari riti, ko nahatətəien sə ro iaminihi irə ruvehimiru in? Rekəm!

¹⁵ Trini minuə piəvtaha riti uə kətirimətaha riti ramarə ərəha tinari səvənhi riwən nəveginien sənəni rəpwəh nəmwhenien,

¹⁶ tihaməkeikei mhəuvei pen tinari uə nəveginien min. Trini minuə hiəpwəh nuvehi penien nari riti min, mhəni pen a tukwe in mə, “Evən ia nəməriniuen, məpwəh nəkwieiiien, məni amasan nari,” nəgkiariien nəha trəfasitu irə? Ro nəri auər a i.

¹⁷ Ia noien nəha rəmwhen a mwi nahatətəien əpa trini minuə ripko mhə nari riti remhə.

¹⁸ Mətə iərmama riti trəgkiari iaminihi irə mini mə, “Ik səim nə nahatətəien, mətə iou səiou nə noien me.” Itə. Ko iko ro iakətoni nahatətəien səim mətə ipko mhə nari riti? Rəknekən. Mətə iou iakukurən noien ikətoni ia noien me səiou mə iakamahatətə pərhiēn.

¹⁹ Ik ikani nīpərhiēnien ia Kumwesən mə in

2:13: Mat 5:7, Mat 18:32-35 **2:14:** Mat 7:21 **2:15:** 1Jon 3:17

2:17: Jem 2:20,26 **2:18:** Kal 5:6 **2:19:** Mat 8:29

kuatia a. Ramasan. Nəremhə me irəha mwi kamhəni nīpərhiēnien irə, nənə kamhəhekir mamhətəmmiwīn.

²⁰ Ik iərmama ikreirei nari. Nahatətəien sə rīpko mhə nari riti ro nəri auər a i. Ikokeikei mə tako ikətōni mə nəri nəha ro nīpərhiēnien i?

²¹ Rerim trīrhi ro kaha kupwən səkitaha Epraham. In ratukwatukw ia nəmri Kumwesən ia noien me səvənhi uə rekəm? Ouəh, Kumwesən rīməni mə in ratukwatukw ia nənimen nəpīn rīnaməmrutə tīni, Aesak, ia təkure nīfatə.

²² Ikətōni mə nahatətəien səvəi Epraham mīne noien me səvənhi krauo nari kuatia. Noien me səvənhi həno nahatətəien səvənhi ruvehe matukwatukw məmwhēn.

²³ Nənə nəgkiariēn i səvəi Nəkukuə Ikinan ruvehe mukuə. Rini mə, “Epraham rīni nīpərhiēnien ia Kumwesən. Nənə tī nəri nə mə in rahatətə iamīnhi, Kumwesən rətə in mə in ratukwatukw ia nənimen.” Kurirə irə kəkwein Epraham mə in riti nə Kumwesən.

²⁴ Ro iamīnhi irə hiamətōni mə iərmama in ratukwatukw ia nəmri Kumwesən ia noien me, rīpko mhə ia nahatətəien əpa.

²⁵ Rəmwhēn a mwi rerīmīaha trīrhi ro prən nəha Rehap, pran səvəi suatuk. In ratukwatukw ia nəmri Kumwesən ia noien me səvənhi uə rekəm? Ouəh, Kumwesən rīməni mə in ratukwatukw ia nənimen nəpīn prən nəha rīnəsevər ia nimwə səvənhi tī iəmə kəru sə kīnərhi pen irau krouevən rouətə afafa Jeriko. Nənə kurirə irə rərhi pen irau krauesi pen suatuk əpə iti rauevən.

2:21: Jen 22:9-12
2Kron 20:7, Aes 41:8

2:22: Hip 11:17-18
2:25: Hip 11:31

2:23: Rom 4:3,9,22,

²⁶ Nipwrai iərmama neiahagien riwən irə ruvamaha. Ia noien nəha rəmwhen a mwi nahatətəien əpa sə ripko mhə nari riti remhə.

3

Ik tikətui amasan ti nəfe nəramim rani

¹ Piak me, rərəha mə kimiaha hiəpik hiəuvehe mho nahatən me ia kimiaha. Kimiaha hiəukurən mə nəpın Kumwesən trəkiri kimaha nahatən me tro riskai mwi m kimaha məpi raka nərmama me nepwın.

² Nəpın ripik kitaha pam samapəti, mətə iərmama sə rəpwəh nəfwəkourien ia nəgkiariien səvənhi in iəmə atukwatukw pərhiēn. Iərmama sə raməkoui amasan nəramın rıməru tukwe in ti nəkouiiēn mwi nipwran me pam.

³ Kitaha saməuvei pen fraetel ia nəkwai hos me mə tuho nəkwataha. Ia noien nəha saməkoui nipwrai hos me pam.

⁴ Hətə ro mwi nitətə me. Nipwranraha rasori. Nımətagi asori me kamhəpwi irapw irəha. Mətə nəri sə raməkəkini irəha irə rouihi a. Kamhəuvən ia kwopun pəku iəmə sə raməkəkini nitətə rokeikei.

⁵ Ia noien nəha rəmwhen a mwi nəramitaha rouihi ia nipwrataha, mətə raməfiutə pik nari. Rerimiahaha tramrhi nəri. Nukumheəv ouihi rukurən nurkwumenien napw asori sə ramahi əmwesi nei mhiə me ripik.

⁶ Nənə nəramitaha rəmwhen ia napw. Rərəha anan ia nipwrataha me pam, mamō nipwrataha me pam ruvehe məmکمیک. Kwopun napw asori rauək ikin ramhiai pehe napw ia nəramitaha.

2:26: Jem 2:17

3:1: Luk 12:47

3:6: Mat 12:36-37, Mat

15:11,18-19

Nənə nəramitaha ramhiai pen napw ia nimiruien pam səkitaha.

⁷ Nəri əprmin me pam həukurən nuveheien mhəmweimwei. Nərmama me həno raka noien nəha ia nirəha me pam, menu me, uə snek me, uə nəmu me.

⁸ Mətə iərmama riti riwən ko ro nəramin ruvehe mimweimwei. Nərami iərmama nəri ərəha riti ko ripkapwis mhə. Rukuər ia nəri akonə sə ramousi əpune iərmama.

⁹ Ia nəramitaha saməgnəgini Kumwesən Tata səkitaha.^a Nənə ia nəramitaha mwi saməkwein ərəha ia nərmama Kumwesən rino irəha həmwən irə.

¹⁰ Nəkwataha kuatia, krouəgnəgini Kumwesən irə, nənə krouarə rouəkwein ərəha mwi ia nərmama. Piak me, noien me nəha mə tripko mhə iamihni.

¹¹ Rəfo, ia nəmri nui kuatia ko nui mine təsi irau pəri kroupour?

¹² Rəfo, piak me, ko niemis rukuə nukwai olif, uə nei nəha krep rukuə nukwai niemis? Rekəm! Rəmwen mwi kwopun kakwəhi təsi ikin ko kīpkukwəhi mhə mwi nui ikin.

Nukurənien sə ruku pen ia neiai

¹³ Sin ia kimiaha rukurən nari, uə nukurənien səvənhi rəpwəmwis? Iərmama nəha traməkeikei mo noien amasan, məpwəh nəfiəutəien in. Noien nəha trahatən pen mə in rukurən pərhiən nari.

¹⁴ Mətə trini minuə rerimiahə ramrhi ərəha kimiaha me uə hiamətərig atukw a ia kimiaha me

3:8: Rom 3:13 **3:9:** 1Kor 11:7 **a 3:9:** Nəgkiarrien səvəi nəkur Kris kupwən rini iamihni irə minuə 'Iərimənu Tata səkitaha.'

mə tihəfo mhəutə mhəpi raka nərmama nepwɪn, kɪmiaha tihəpwəh nəfiəutəien ia kɪmiaha me mə hiəukurən nari, ti nəri nə mə ia noien nəha hi-ameikuə a mhəpwəh niniien nɪpərhiēien.

¹⁵ Iərmama sə ramo noien nəha rɪpkuvehi mhə nukurənien sə ruku pen ia neiai, mətə in ruvehi nukurənien sə ruku pen ia tɪprənə i. Nənɪmwɪn lkinan rɪpkuvei pen mhə nukurənien nəha min, mətə ruku pen ia nəremhə me.

¹⁶ Nəpɪn nərmama rərɪnraha ramrhi ərəha irəha me uə irəha kamhətərig atukw a ia nirəha mə tuhəfo mhəutə mhəpi raka nərmama nepwɪn, ia kwopun kamharə ikin tihətoni kamho pripri ia narimnari me, mamho mwi noien ərəha me pam.

¹⁷ Mətə iərmama sə ruvehi nukurənien nəha ruku pen ia neiai noien səvənhi ropə. Nəri sə rakupwən nətərigien səvənhi rəmher. In iərmama sə raməmri nəmərɪnuien. Noien səvənhi ramasan məpou. In ramsiai nətərigien səvəi nərmama me səpəmsəpə. In ramapi pɪk ti nərmama. Nukurənien səvəi iərmama nəha rukuə nukwan rɪpɪk sə ramasan ia nɪmɪruien səvənhi. In ramo rəmnəmwhen ia nərmama me pam, məpwəh neikuəien.

¹⁸ Nəpɪn nərmama səməme kamhəmri nəmərɪnuien kamharə ia nəmərɪnuien rəmwhen mə kamhəpwei nuni nari riti. Nuni nari nəha trutə mukuə kwənkwan nə narəien sə ratukwatukw.

4

Iərmama sə rokeikei pɪk noien səvəi tɪprənə i

1 Nəfe nəha nukune naruagəniēn me mine nukune nəvisəien me səkimiaha? Rosi in i uə rekəm? Ia rerimiaha kimiaha hiokeikei pik mə tihəregi ramasan ia narimnari me pam, nənə noien nəha ramo kimiaha hiaməvisə ia nəpın me.

2 Hiokeikei nari riti, mətə rəknekın ti nuvehien, ro pen hiوسی əpune iərmama tukwe. Rerimiaha rakres nari riti səvəi iərməpə, mətə rəknekın ti nuvehien, ro pen hiəvisə, mamharuagən tukwe. Kimiaha hiəpwəh nuvehien nəfe hiokeikei, ti nəri nə mə hiəpkəres pen mhə Kumwesən i.

3 Trini minuə kimiaha hiəres pen i, hiəpwəh nuvehien, ti nəri nə mə hiaməres, mətə nətərigien səkimiaha ripkatukwatukw mhə. Narimnari me nəha hiaməres pen Kumwesən mə truvei pehe m kimiaha, hiokeikei mə tihəuvehi nənə mhəuvehi nəmri nari sə nətərigien ərəha səkimiaha rokeikei.

4 Kimiaha hiəmwhen prən i sə raməpwəh səvənhi iərman mamesi pen iərman əpə. Rəfo? Rosi kimiaha hiəreirei mə iərmama sə rokeikei pik noien me səvəi ti prənə i truvehe iərmama sə raməmwəki Kumwesən? Ro iamınhi irə trini minuə iərmama riti ia kimiaha rinuə trokeikei pik noien me səvəi ti prənə i in trəmwəki Kumwesən.

5 Rəfo? Rosi kimiaha hiəreirei nəgkiariien i raməmak ia Nəkukuə Ikinan? Rani mə,
“Nənimwın nəha Kumwesən rinəmri raməmak ia reritaha rokeikei pik

mə kitaha səvəi Kumwesən əpa.”

Nənə nəgkiariien nəha ripko mhə nəri auər a i.

6 Mətə Kumwesən raməriari pehe namasanien m kitaha rasori pik. Ro pen Nəkukuə Ikinan rani mə,

“Kumwesən rerin rɪpkagien mhə ti nərmama səməme kamhəfiəutə ia nirəha, mətə raməriari pen namasanien səvənhi m nərmama səməme kamhəuvehi irəpw irəha.”

⁷ Ro iamɪnhi irə kɪmiaha tihaməkeikei mheiwaiu, mharə tegin Kumwesən, mhəni rekəm ti Setan, nənə in trəpwəh kɪmiaha map.

⁸ Kɪmiaha tihəuvehe ipaka ti Kumwesən, nənə in truvehe ipaka tukumiaha. Kɪmiaha nəkur ərəha me tihaməkeikei mhərkwerig. Kɪmiaha nətərigien səkɪmiaha ro kəru tihaməkeikei mho rerimiaha rəmher.

⁹ Ramasan mə tihəregi rərəha, mhasək, mhəkwein əpwəmwis. Pwəh narisien səkɪmiaha ruvehe mo nasəkien irə. Pwəh nagienien səkɪmiaha ruvehe mo nəpouien irə.

¹⁰ Kɪmiaha tihaməkeikei mheiwaiu mhənɪmwi nukurhumiaha ia nəmri Kumwesən, nənə in truvehi utə kɪmiaha.

Kɪmiaha tihəpwəh nini ərəhaien kɪmiaha me

¹¹ Piak me, kɪmiaha tihəpwəh nini ərəhaien kɪmiaha me. Iərmama sə rani ərəha piəvni uə rani piəvni mə ramo noien ərəha, iərmama nəha ramini ərəha Loa səvəi Kumwesən, mamini mə Loa nəha rəpwəh nəmwhenien. Mətə nəpɪn ikani loa nəha mə rəpwəh nəmwhenien, ikəpwəh noien nəfe Loa nəha rani, mətə ikamo ik iəmə sə ikasori ia Loa nəha.

¹² Iərmama kuatia in əpa rauvehi nasorien mə trəmri Loa, məkiri noien me səvəi nərmama, nənə

mərpwɪn tai noien me səvənraha. Iərmama nəha in nəha rauvehimɪru nərmama, mamouraha mwi irəha. Mətə ik sin i? Rəfo ikaməkiri noien me səvəi piam?

Ik tikətɪgite ia Kumwesən ia nəfe tiko trakwakwi tineis mine

¹³ Tihətərig ia nirak kɪmiaha səməme hiaməni mə, “Ipwet uə trakwakwi tsəuvən ia taon i uə taon nəha, mharə nuk kuatia, mho pisnes fwe ikɪn, mhəuvehi mane.”

¹⁴ Kɪmiaha tihəfukurən nəfe trimwei irapw trakwakwi? Nəfe nəha nɪmɪruien səkɪmiaha? Kɪmiaha hiəmwhen ia nise napw sə ruvehe nəpɪn oulhi a nənə marə miwən mwi.

¹⁵ Mətə nəgkiariien sə ratukwatukw mə kɪmiaha tihəni ro iamɪnhi irə, “Trini minuə nəkwai Kumwesən pərhiən, tsarə mho narimnari me i uə narimnari me nəha.”

¹⁶ Mətə ipwet mine kɪmiaha hiaməgkiari mamhəfiutə ia kɪmiaha. Nəgkiariien sə raməfiutə nərmama iamɪnhi rərəha.

¹⁷ Iərmama sə rukurən nəfe noien ratukwatukw mə tro, mətə in rəpwəh noien, in ramo nərəhaien.

5

Nəvəhagien ramevən ti nərmama nautə səvənraha rasori

¹ Kɪmiaha nərmama nautə səkɪmiaha rasori tihətərig ia nirak. Ramasan mə kɪmiaha tihasək mhəkwein əpwəmwis ti nəmisəien me nəha səməme kamhəuvehe tuheste kɪmiaha.

² Nautə səkɪmiaha ruvəmərɪr. Uvnə me hənani

raka tɪnari me səkɪmiaha.

³ Kol mine silva səkɪmiaha rɪnɔpwei raka. Nɔpweien nəha səvənraha trahatən pen mə nɪpərhiɛnien kɪmiaha hiəno noien ərəha, nənə trahi nɪpwramiaha rəmwhen ia napw. Ipaka nəpɪn sampam i, mətə kɪmiaha hiamoeite ihi nautə me səkɪmiaha.

⁴ Hətə ro! Nərmama me səməme kamhowok həno raka wok fwe ia nəmhien me səkɪmiaha, mətə kɪmiaha hiəpwəh nərəkuien irəha. Nərəkuien nəha səvənraha ramasək mani mə kɪmiaha hiəno noien ərəha. Iərimənu sə rauvehi nɪskaiien me pam ruvəregi raka ia nəkwəregin nasəkien səvəi nərmama səməme kamhesi nəveginien sə ruvəmruə fwe ia nəmhien me səkɪmiaha.

⁵ Ia tɪprənə i kɪmiaha hiəpwəh nɪseseien. Nəfe nautə me kɪmiaha hiəkeikei mə tihəuvehi hiaməuvehi. Hiaməkwməni atukw a kɪmiaha hiaməisi mhəmwhen ia kau me səməme rɪpko mhə tui kousi əpune irəha.

⁶ Kɪmiaha hiaməkiri nəmə atukwatukw me mə tuhaməkeikei mhemhə. Hiamousi əpune irəha, nənə həpwəh nəsisəgien kɪmiaha.

Nətərigien səkɪmiaha trəpwəmwis

⁷ Piak me, kɪmiaha tihaməkeikei mho nətərigien səkɪmiaha rəpwəmwis, mamheitenhi mheste nuveheien səvəi Iərimənu səkɪtaha. Hətoni ro iərmama sə raməmhu raməfo mamə nətərigien səvənhi raməpwəmwis mameitenhi nəveginien amasan sə rutə pehe ia tɪprənə. Ko rɪpkesi akwauakw mhə, mətə tro nətərigien səvənhi rəpwəmwis meste nesən kupwən rauər nənə

mækwə me nepwɪn hæuwehe mhæukurau nənə nesən sə ro kəru irə rauər mwɪ.

⁸ Kɪmiaha mwɪ tihaməkeikei mho nətərigien səkɪmiaha rəpwəmwiːs mɪskai tɪ nəri nə mə nuveheien səvəi lərimənu səkɪtaha ruvəuwehe ipaka.

⁹ Piak me, kɪmiaha tihəpwəh nɪni ərəhaien kɪmiaha me kamo Kumwesən rərpwɪn noien ərəha me səkɪmiaha. Hətə ro! Iəmə sə trərpwɪn noien ərəha me səvəi nərmama ruvəuwehe ipaka. Ramərer a ia kwəruə.

¹⁰ Piak me, rərɪmiaha tramrhi profet me nəha fwe kupwən haməgkiari ia nəghi lərimənu. Nəpɪn kamo nəmisəien mɪnraha, ho nətərigien səvənraha rəpwəmwiːs.

¹¹ Ia nətəien səkɪtaha nərmama səməme kamhərer əknekɪn ia nahatətəien səvənraha ia nəpɪn me Kumwesən ramo irəha hamagien. Kɪmiaha hiəuvəregi raka noien səvəi Jop. Nəpɪn ramarə ia nəmisəien me rɪpɪk, rərer əknekɪn ia nahatətəien səvənhi. Nənə hiənətə raka nəfe lərimənu rɪno mɪn kurirə ikɪn. lərimənu rerɪn ramərkwəpɪr pɪk tɪ nərmama. In ramapi tɪ nɪrəha.

Kɪmiaha tihəpwəh nakutanien ia nəgkiariien me

¹² Mətə piak me, irənhə ia narimnari me pam, trɪni mɪnuə kɪmiaha hiəni promes riti tihəpwəh nakutanien ia nəgkiariien səkɪmiaha mə tiho nərmama hətəni kɪmiaha hiaməni pərhiən. Tihəpwəh nɪniien nɪtətə ia neiai uə tɪprənə i uə nari riti mwɪ mə tiho noien nəha. Mətə trɪni mɪnuə hiəsəni nari riti, tihəni a mhəsəni mə “Ouəh.” Trɪni mɪnuə hiəpkəsəni mhə nari riti, tihəni a

mə “Rekəm.” Mə kɨmiaha hiaməgkiari əpnapən, Kumwesən trərpwɨn noien ərəha səkɨmiaha.

Nəfwakiien sə ramo nɨpwrən

¹³ Rəfo? Riti ia kɨmiaha raməmisə? Ramasan mə rəfwaki. Riti ia kɨmiaha rerɨn ramagien? Ramasan mə rəni nɨpu, məgnəgɨni Kumwesən.

¹⁴ Riti ia kɨmiaha ramemhə? Ramasan mə rəkweɨn elta me səvəi nəfwakiien pwəh irəha hətəgi pen oel irə ia nəghi Iərimənu mhəfwaki tukwe.

¹⁵ Nənə nəfwakiien səvəi nərmama səməme kamhahətətə ia Kumwesən truvehimɨru iərmama sə ramemhə. Iərimənu tromasan iərmama nəha. Trɨni mɨnuə iərmama nəha rɨno noien ərəha me, Iərimənu trenouenou noien ərəha me nəha məpwəh nərpwɨnien.

¹⁶ Ro iamɨnhi irə kɨmiaha tihəni pen tukumiaha me i noien ərəha me səməme hiəno, nənə mhəfwaki tukumiaha me mə Kumwesən tro kɨmiaha hiəuvehe mhəsənɨn. Nəpɨn iərmama sə ramo noien atukwatukw raməfwaki, nəfwakiien səvənhi nəgsen rasori mamə nɨpwrən.

¹⁷ Profet Elaeja in iərmama rəmwhen a ia kitaha. Rəfwaki skai mə nesən trəpwəh nauəriən. Nənə nesən rɨpkauər mhə ia tənə nəha nuk kahar məkwə sikis.

¹⁸ Nənə kurirə ikɨn rəfwaki mwɨ, nənə nesən rukrutə ia nɨmagouagou, kwənkwai narimnari me hətətə mwɨ ia tɨprənə.

Iərmama sə rəruei

5:13: Kol 3:16 **5:14:** Mak 6:13 **5:15:** Mak 16:18 **5:17:** 1King 17:1, Luk 4:25 **5:18:** 1King 18:42-45

19 Piak me, trini minuə kimiaha riti rəpwəh nəgkariien sə ro nɪpərhiēnien məruei, nənə kimiaha riti mwi riri in mɪrərɪg,

20 iakokeikei mə rerimīaha tramrhi nəri i. lərmama sə ramiri raka iəmə ərəha ia suatuk sə raməruei irə mɪrərɪg, in rauvehimɪru iəmə ərəha nəha mə trəpwəh nemhəien. Kumwesən trenouenou noien ərəha me həpɪk səvəi iəmə ərəha nəha, məpwəh nərɪpwɪnien.

Nəkukuə Ikinan
The New Testament in the Nafe (Kwamera) language
of Southeast Tanna, TAFEA Province, Vanuatu
Niutestamen long lanwis Nafe blong Vanuatu.
Le Nouveau Testament dans la langue Nafe de
Vanuatu.

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 18 Apr 2025 from source files dated 31 Aug 2023

26b0f540-c192-5878-be67-18ede9ab1416